

# Kart nech daa bzej Páblona' na' bseleen lao Timotewa'

**1** <sup>1</sup>Nad' Pablo, nak' postl che Jesucrístona' kwenche wi'a xtilleena', la' Chioza', beena' bisla cho' kwenche bi kwiayi'cho, len Cristo Jesúza', beena' noncho lez gone' wen checho, bzoagake' nad'. <sup>2</sup>Chzej' li, Timoteo, nako' ka dowalj bi cha' daa nakcho txen chonlilall'cho Jesucrístona'. Xacho Chioza' len Xancho Cristo Jesúza' gaklenshgagake' li, na' yiyesh'lall'gakile' li, na' gongake' ka so' mbalaz.

<sup>3</sup>Kana' ba zoa shaa Macedóniana', wñabid' li' yigaano' Éfesoná' kwenche yoo ben'ka' chli' chsedi daa bi nak dii li bi gongake' ka', <sup>4</sup>na' bi segake' wneyi che dill' golka' wdiljlall' ben' na' che diika' ben dii xoxztoe'ka' daa bi chiyoll chido. La' dill'ka' chonan ka chakgued ben' na' bi chaklenen gombia'gake' daa cheeni Chioza' goncho daa nonlilall'chone'.

<sup>5</sup>Ye'gako'ne' ka' kwenche gapgake' yel' chaki ka daa chalj loo yichjlall'do' beena' ba bixi biyech na' bibi de chao chdian le' daa nezile' chone' ka chazlall' Chioza' na' nonlilalleene' do lallee. <sup>6</sup>Balgake' lwaa segake' wneyi cheyi diiki, ba lenzgake' choe'gake' dill' cheyi diika' bi zakii. <sup>7</sup>Cheenzgakile' gakgake' ben' wli' wsedi ley che Chioza', per ni lekzgakile' bi chajni'gakile' daa chli' chsedgakile' la'kzi nazgake' kayen'nan nakan.

<sup>8</sup>Nezicho ley che Chioza' nakan wen, shi wchinchon ka chiyali. <sup>9</sup>La' nezicho aga ben Chioza' leya' ni che ben'ka' chon wen, san ni che ben'ka' chyishj xtilleena' len ben'ka' bi chzenag, ben'ka' bi chall chlleb Chioza', ben' saaxyaka', ben'ka' chiyit xaxna'yin, yog' ben'ka' nak wen xya, <sup>10</sup>ben'ka' chñelen xiin xool ben', ben'ka' nak ben' xej, ben'ka' chit' chde ben', ben'ka' chziye', ben'ka' ax't choagake' Chioza' de taschiw kat' chziye'gake', na' nottez ben' bi chone' daa na cho'a xtill' Chioza' <sup>11</sup>kon ka chzajni dill' wen dill' kob che'na' daa nak dii zakii nllleb. Na' Chioza', beena'

chidol' we'la'ocho, ba bene'n lall' na' wi'an dill'.

<sup>12</sup>Cho'a Xancho Cristo Jesús'a yel' choxken chone' nad' wal, na' nxenlallee nad' wak gon xshine'na', na' bzoe' nad' gona'n. <sup>13</sup>La'kzi biya dii ben wnia' che', na' bchi' bsakaa ben'ka' benlilall'gake'ne' na' bshagdil' legake', Chioza' biyesh'lallile' nad' daa bi wnezid' bin chon' kana' bin' shajli'a che Jesús'a. <sup>14</sup>Na' dii xen goklene' nad', bene' ka chonlilall'chee na' bene' nad' yel' chakina' daa nak' txen Cristo Jesús'a.

<sup>15</sup>Dillii nakan dii wxenlall'cho, na' yog'lol' ben' chiyal' shajli'en: Cristo Jesús'a bide' yell-lioni kwenche yisle' ben' saaxyaka', na' nad'yen' goklikz' ben' saaxya wal. <sup>16</sup>Per Chioza' biyesh'lallile' nad' kwenche wli' Jesucristona' do ka nak yel' chxenlall' xen che'na' na' ile'i ben'ka' zi' shajle' che' na' gagake' yel' mban zejli kani. <sup>17</sup>Toshiizi shajla'oshga beena' chnabia' zejli kani, beena' biga lli'a te che', beena' zoakz la'kzi bi chle'ichone', na' sho'shgue' balaan. Zeelo len' nake' Chios. Kan' gakshgan.

<sup>18</sup>Timoteo, xiindawaa, nia' li' chiyal' gono' ka wdixje'i ben'ka' li' daa goll Chioza' legake' cho' dii nechte, kwenche daa wnagake' cho' gaklanan li' gono' ga zeelo yizoilo' gono' xshin Chioza' daa nak lall' no'. <sup>19</sup>Toshiizi so' gonlilalloo Jesucristona' na' tlizi gono' wen kwenche bibi gao idian li' daa nezilo' chono' ka chazlallee. La' bal' ben' dii shao'tekzə chongake' daa bi chiyal' gongake' na' bich chonlilall'gake'ne'. <sup>20</sup>Ka gok che Himenewa' len Alejándrona', na' wñabid' Chioza' gagake' lall' na' Satanáza' kwenche wsedgake' bich bi gon inazgake' che Chioza'.

**2** <sup>1</sup>Naa nia' li' daa lli'alote gonle: chiyal' we'lwill-le Chioza' na' inabilene' daa chyallj chchinile na' daa chyallj chchini ben' yoblə, na' gat'yoile'ne' gaklene' yog'lolte ben', na' we'lene' yel' choxken ka nak daa chone' che yog'lol' ben' yell-lioni. <sup>2</sup>Chiyal' inabicho Chioza' gaklene' ben' wñabia'ka' na' yog'lolte ben' nak joschis, kwenche soacho mbalaz na' kono wsej wllon we'la'ocho Chioza' na' goncho daa cheenile'. <sup>3</sup>La' dgan nakan wen na' chazlalli Chiozan', beena' bisla cho' kwenche bi kwiayi'cho, <sup>4</sup>na' cheenile' yog'lolte ben' yell-lioki yilagake' na' gombia'gake' daa nak dii li. <sup>5</sup>La' toz Chiozan' zoa, na' toz beena' chizoa ben' yell-lioni wen kon Chioza', len' Cristo Jesús'a, <sup>6</sup>beena' bzani kwine' wite' kwenche wdixje' xtol' yog'lol' ben' yell-lioni. Na' dga gokə,

gokan llana' bllia Chioza' bia', na' bli'e cheenile' yisle' cho'. 7Na' kwenche inezi yog' ben' dga, bzoe' nad' nak' postl che' na' bene' lall' na' chyixji'a xtilleena'. Na' bene' lall' na' wli' wsedid' ben'ka' bi nak ben' Israel, kwenche shajle'gake' dill' li che'na'. Na' dga cho'a dill' nakan dii li, na' bi chziyaa.

8Cheenid' yog'lol' ben' byoka' we'llwillgake' Chioza' gattezə zoagake', na' chiya' gaggake' ben' lall'do' nxi nyech, ben' bi yoo daa nak yel' chllaa yel' chlok na' yel' wishagdil' kat' wlis neeka' lawe'na' we'llwillgake'ne'. 9Na' ka nak noolka', chiya' wsak'gake' gawk xagake', na' bi tezgake' lawin yiyiljall'gake' naklə yipaa yichje'ka', ni bi wchingake' no or wa lech' zakii inleeb. 10San gonləgake' to dii byen seyī chegake' chongake' wen lega ben' choe'la'o Chios. 11Chiya' kwe' noolka' llizə wzenaggake' che ben'ka' chli' chsedī cho'a xtill' Chioza' na' wzoagake' xtilleeka'. 12Bi cho'a latj wli' wsedzi noolka' ben' byoka', ni bi inabia'zgake' legake', san chiya' kwe'gake' llizə wzenaggake'. 13La' Chioza' bene' zigaate Adánna', na'techlə bene' Évana'. 14Na' aga Adánna' wxiye' dii xiwaa, san noolan' wxiye'n na' bxope' lao saaxyana'. 15Na' noolka' chzoa xiinīn, bi tegake' lao yel' zi'na' shi toshiizi nxenilall'gake' Chioza', na' segake' wneyi gaggakile' ben', na' soagake' gongake' ka cheeni Chioza' lega ben' nyeen nyeeniyi.

**3** 1Dillii nakan dii wxenlall'cho: shi no cheeni koo lall' nee gap wwie' ben'ka' nonlilall' Crístona' na' wli' wsedile' legake', llin wen inleeban llialallee gone'. 2To ben' ngoo loo nee chli' chsedile' ben', chiya' gake' ben' zoa do yichj do lallee, ben' bibi cho'a xtillee de. Chiya' soa toz xoole', na' gake' ben' nsa' cheyin wen, na' gake' ben' nyeen nyeeniyi, na' ben' chidolee gap ben' le' balaan. Na' chiya' yiyeshile ben' wi'e ga yigaane', na' gakte wli' wsedile' ben'. 3Bi chiya' gake' ben' weezo, ni bi gake' ben' wishagdil, ni bi selall'chgaile' mech, san gake' ben' wen, ben' gaxjlall'. 4Chiya' gak kwee xnez xlatji dii chak loo yoo lille', na' gone' byen wzenag xiine'ka' che' na' soagakb' gongakb' daa nak wen. 5La' shi to ben' bi chak kwee xnez xlatji dii chak loo yoo lille', ¿nakra gone' kwee xnezi che ben'ka' nxenilall' Chioza'? 6To ben' shinzə wzolo chonlilallee Crístona' bi chiya' gak lall' nee gap wwie' ben'ka' nonlilall' Crístona', kwenche ki gakte' ben' chep cha'lall' na' wchoglo Chioza' che' ka ba nchogloe' che

dii xiwaa. <sup>7</sup>Lekzka' chiya! seyi che' chone' wen lao ben'ka' bi nonlilall' Crístona' kwenche kono biz gon ina che' na' gonza dii xiwaa gan wchixan le'.

<sup>8</sup>Lekzka' ben'ka' gak lo na'gake' gaklengake' wwiagake' bin chyallj chchini ben'ka' nakgake' txen nonlill'gake' Crístona', chiya! gaggake' ben' chidol' gap ben' legake' balaan, ben' chda do lallee, na' bi sollgakile', ni bi gatzgake' ben' wzelall'. <sup>9</sup>Chiya! soacheghake' shajle'gake' dii li daa ba bzajni Chioza' cho' daa kono wnezi kana'. Na' chiya! soagake' do yichj do lall'gake' na' bibi de gao idian yichjall'do'eka' daa nezgakile' chongake' ka cheeni Chioza'. <sup>10</sup>Na' lekzka' kat' kweje ben'ki, chiya! wwiayen'le nak nsa' chegake'. Na' shi bibi de dii chao xya chegake', wak gak lo na'gake' wwiagake' bin chyallj chchini ben'ka' nakgake' txen nonlill'gake' Crístona'. <sup>11</sup>Na' noolka' lekzka' chiya! gaggake' ben' chidol' gap ben' legake' balaan, na' bi gaggake' ben' wichitj dill', san gaggake' ben' nsa' cheyin wen, na' gaggake' ben' gak wxenall'cho toshiizi gongake' wen. <sup>12</sup>To ben' gak lo nee wwie' bin chyallj chchini ben'ka' nake' txen nonlill'gake' Crístona' chiya! soa toz xoolle', na' chiya! gap wwie' xiine'ka' kwenche gongakb' wen, na' kwe' xnez xlatji dii chak loo yoo lille'. <sup>13</sup>Ben'ka' chak chgoogake' xnezi che diika' chyallj chchini ben'ka' nakgake' txen nonlill'gake' Crístona' chidol'gake' to balaan, na' soachgagake' mbalaz daa nonlilall'gake' Cristo Jesús'a'.

<sup>14</sup>La'kzi ba non' lez yobza yidwia' li', chzej' dga <sup>15</sup>kwenche shi bi chyobzid' yid', na' ba nezilo' nakan chiya! soa ben'ka' nak xiin Chioza', la' cho' chdop chllagcho choe'la'ochone' nakcho xiin Chios yaa Chios banna'. Na' nak lo na'cho goncho ka gombia' ben' dill' li che'na'. <sup>16</sup>Dii li dga chzajniin cho' che Crístona' daa kono wnezi nakan dii zakii nleeb, na' nan:

Bide' golje' ka cho' ben' yell-lio,  
na' Espíritu che Chioza' bli'e nan nake' ben' li ben'  
shao'.

Na' ble'i anjlka' le',  
na' wda ben' be'gake' cho'a xtilleena' lao ben'  
yell-lioki,  
na' benlilall'gake'ne'.  
Na' biyep'e yabana' gana' yo'e to balaan xen.

**4** <sup>1</sup>Espíritu che Chioza' cho'e dill' kwaslōl, ne' kat' ba zoa te che yell-lioni, bal ben'ka' ba nonlilall'gake' Crístona' bich gonlilall'gake'ne', na' wzenaggake' che dii xiw'ka' na' diika' chli' chsedi ben' chegakin. <sup>2</sup>Na' wzenaggake' che ben' wxiye'ka', ben'ka' bichbi chao chdian legake' daa ba nlantekzgabe' ye' wxiye'na'. <sup>3</sup>Na' chllongake' wshagna' ben', na' chllontegake' yeej gaogake' bal ye' wao la'kzi Chioza' wlo'e ye' waoka' kwenche cho' nonli'lall'chone' na' nombia'cho dill' li che'na' gaochon na' we'chone' ye' choxken. <sup>4</sup>La' yog'lōl daa bxe bsil Chioza' nakan wen, na' bibi de dii inacho bi gak gaochon kon shi we'chone' ye' choxken kat' yeej gaochon. <sup>5</sup>La' daa chajle'cho cho'a xtill' Chioza' na' daa choe'lwillchone', chonleeye' ye' wao chechona'.

<sup>6</sup>Shi dga wli' wsedilo' bish' ljwellchoka', na' gako' to wen llin wen che Jesucristona', na' tolla' ba nono' cho'a xtill' Chioza' loo yichjlall'do'na' len dii wenna' daa bsedo' na' zej chono'n. <sup>7</sup>Na' bi wzenago' bizə dill' gol dii chsees' ben', diika' wdiljlall'gake' daa bi nak ka dii shajle'cho, san bsd gono' ka cheeni Chioza'. <sup>8</sup>Nezicho kat' chchitj ni'a na'choki chaklenan kwerp chechoni. Per daa choncho ka cheeni Chioza', dii xentechlə chaklenan cho' naa zoacho yell-lioni na' lekzka' kat' illin lla ljazoalenchone'. <sup>9</sup>Dillii nakan dii wxenlall'cho, na' yog' ben' chiyal' shajli'en. <sup>10</sup>Na' ni cheyinnan' chonnto' to dii byen chilalinto' chonnto' xshin Chioza' daa ba nonnto' lez Chios yaa Chios banna', beena' cheeni yisle' yog'lōl ben', na' ben'ka' chonlilall'yen' len' yisle'.

<sup>11</sup>Diikin chiyal' yoo ben' gongake' na' wli' wsedilo' legake'. <sup>12</sup>Bi weezo' latj no ile'zi li' nakzi daa nako' bi' wew', san ben wen lao ben'ka' nonli'lall' Crístona', ka de cho'a dill', na' ye' nsa' cheyin wen, na' ye' chaki ben', na' ye' nonlilallii Crístona', ni bibi dii mal sa'laloo, kwenche lengake' gongake' ka'. <sup>13</sup>Shlak yid', ben ka dii le blab Cho'a Xtill' Chioza' lao ben'ka' chdop chllag, bli' bsdgakile', na' btip lall'gake'. <sup>14</sup>Bi guetlalloo daa ben Chioza' lall' no' kana' ben'ka' ngoo lall' na'gake' ben'ka' nonlilall' Crístona' bxoā neeka' yichjo'na' bengake' li' lall' na' Chioza', na' bchej beena' wdixjee nan Chioza' ba wleje' li' gono' xshine'na'.

<sup>15</sup>Ben to dii byen ben diiki wloo Chioza' lo no' gono', na' benyenaan kwaslōl kwenche gakbe'i yog'lōl ben' ba zejch chono' wen. <sup>16</sup>Wze wneyi che kwino' na' cheyi daa chli' chsedilo' ben',

na' toshiizi wno'n. Na' shi gono' ka nan, na' yisla kwino' len ben'ka' chzenaggake' daa chli' chsedilo'.

**5** <sup>1</sup>Bi inezo' zibia' ben' golka', san be'lengake' dill' xochi ka ben' chshaljlen xayin. Na' goni ben' bishoo ben' xkwid'ka'. <sup>2</sup>Na' goni xnoo noolka' ba ngolch ka li', na' goni ben' zano' nool xkwid'ka', na' bibi dii mal sa'laloo.

<sup>3</sup>Goklen nool wizebka', ben'ka' kono zoa chegake'. <sup>4</sup>Per shi zoa xiin xsoagake', chonan byen inezgakib' chiya! gap wwiagakb' le', la' len' bisgole' legakb'. La' kan' chazlall' Chioza' goncho. <sup>5</sup>Nool wizeba', beena' kono zoakz cheyin, beena' bgaan tlish' tyaj, chxenilallee Chioza' na' ka tella ka wal choe'lwille'ne' na' chat'yoile'ne' gaklene'ne'. <sup>6</sup>Per nool wizeba', beena' choe' cho'a xbayi beli chen che'na', nake' ka ben' net lao Chioza' la'kzi mbane'. <sup>7</sup>Bzajni'gakile' dga kwenche bibi gon inaz ben' chegake'. <sup>8</sup>La' beena' bibi wneyi ze che no dialla che' na' che ben'ka' nakyenee txen loo yoo lille'na', ba wlej yichje' daa nak che Chios, shi ka' chone', na' ba nxinjtechlə yichjlall'do'ena' aga ka beena' bin' shajle' che Chioza'.

<sup>9</sup>Lee yisha' gana' da' le nool wizebka' chiya! ta' le ben'ka' ba wdeli guiyon yiz, ben'ka' ben banez kochno bikaagake'. <sup>10</sup>Chiya! seyi chegake' chongake' wen: daa gok bisgol xiine'ka', daa chiyesh'lall'gakile' ben' choe'gake' ga yigaangake', daa chongake' bittez dii gaklenen ben'ka' nonlilall' Chioza', axt chyibgake' ni'eka', na' daa chaklengake' ben'ka' chzak'zi', na' daa chongake' ka dii le chongake' yog' daa nak wen.

<sup>11</sup>Na' bi wdoo le nool wizebka' lee yisha' shi bin' gaggakile' guiyon yiz. La' zoa kat' we'gake' cho'a xbayi beli chen che'ka' na' yikaa chegake' na' bich gongake' kwaslol xshin Crístona', <sup>12</sup>na' gaggake' dol' lao Chioza' daa bi saggakile' gongake' ka ba bchebgake'. <sup>13</sup>Na' leyi chiyakgake' noolə lia na' chdagake' to to yoo. Na' aga toz daa, san lekzka' chchitjgake' dill', na' chjalaalli chegake' dii chak che ben' yoblə, na' choe'gake' dill' dii bi chiya! we'gake'. <sup>14</sup>Daan nool wizebka' ni zoa xlatjin, cheenid' yikaa chegake' na' yizoa xiingake', na' koogake' xnezi dii chak loo yoo lillgake', kwenche bi wxa'gake' cho'alao ben'ka' bi chonlilall' Chioza'. <sup>15</sup>La' bal' nool wizebka' ba bichejgake' lo xnez Chioza' na' ba zjanogake' Satanáza'lə.

16 Shi to ben' nonlilall' Chioza' zoa to dialla che' nool wizeb, chiyal' gaklene'ne' kwenche bi gake' to dii zii dii zshab che ben'ka' nonlilall' Crístona', na' gak we'gake' daa chyallj chchini nool wizebka' kono zoa chegake'.

17 Ka nak ben'ka' ngoo lall' na'gake' ben'ka' nonlilall' Crístona', na' chak chgoogake' xnezin wen, chidol'gake' balaan xen. Na' ben'ka' noni xshingake' choe'gake' cho'a xtill' Chioza' na' chli' chsedgakile', balaan xentechlā chidol'gake'. 18 La' Cho'a Xtill' Chioza' nan: “Ka nak goona' bana' chilali chlej chshoshjb trígona' kwenche ichej xayinna', bi wllinle yixja' cho'aba' kwenche gak koyob to chop cho'a.” Na' lekzka' nan: “Beena' chon llinna' chidolee ikaa laxje.”

19 Shi no chao xya che to ben' ngoo lall' na' ben'ka' nonlilall' Crístona', bi wzenago'n shi bi zoa chop shon ben' yizi' cho'agake'n. 20 Na' shi ga zoa ben'ka' bi chsankzgake' dii mala', chiyal' wsheshleno' legake' kat' ndop nllagle kwenche yog'lol ben'ka' nakle txen illebgake' na' bi gongake' ka'. 21 Chat'yoid' li' lao Chioza', na' lao Jesucrístonā' na' lao anjl che'ka', toshiizi gono' diiki ba wnia'. Na' toz ka gonilo' yog'lol ben', aga balze' gakilo'. 22 Bi wxoazə noona' yichj beena' cheeni gon xshin Chioza' shi bi nezilo' nak nsa' che', kwenche ki gako'ne' txen shi chone' dii mala'. Wdapshii kwino' kwenche ki ta' icheno' dii mala'.

23 Daa chak li'ona' na' daa zekizezi bi shawoo, bich yeejteko' toz nisa', san weej lat'do' wej vinona'.

24 Bal dii malka' chon ben' chli'lawin ka zi' gaolə ben' xya chegake'. Na' zi balan, zi' chila' chinezli bənaan. 25 Na' ka'kzə, dii wenna' daa chon ben' nla'xejgakan, na' la'kzi de dii wenna' daa ngash', wllin lla wli'lawin.

**6** 1 Yog'lol ben'ka' ndoo lla yel chongake' xshin ben' na' ba chonlilall'gake' Crístona', chiyal' sho' yichjgake' gapgake' xane'ka' balaan kwenche bibi gon inaz ben' che Chioza' na' cheyi daa chli' chsedicho. 2 Na' shi xane'ka' nonlilall'gake' Crístona', la'kzi ba nakgake' ben' bish'gake' daa chonlilall'gake' Crístona', chiyal'kz gapgake' legake' balaan, na' chiyal' gonchləgake' xshine'ka' do yichj do lall'gake' daa chakgakile' legake' na' nezgakile' ben'ka' si' banez xshine'ka' nakgake' ben' nonlilall' Crístona'. Dgan chiyal' wli' wsedilo' legake' na' ye'gako'ne' gongake'n.

<sup>3</sup>Shi no chli' chsedi dii nak nlla'lə na' bi chidil̄in daa bli' bsemi Xancho Jesucristona', na' bi chidil̄tein daa chsedi cho' goncho ka cheeni Chioza', <sup>4</sup>beena' chon ka' nake' beṅ' chep cha'lall', beṅ' bibi nezi. Na' daa le chibaile' gakkil̄-lene' beṅ', chx̄ie' daa nak yeḷ' xe', yeḷ' wishagdil̄, yeḷ' chbell chne che beṅ', na' yeḷ' chza'lall' mal che beṅ'. <sup>5</sup>Na' biga yiyoll yido gakkil̄-lene' beṅ' daa ba nxinj yichlall'do'ena', na' bi nombi'e daa nak dii li. Na' chakile' daa chonze' ka chli' chsedi che Chioza' gatile' mech xen. <sup>6</sup>Dii li, le mbalaz soacho shi goncho ka cheeni Chioza' na' goncho banez ka'k' to dii de checho. <sup>7</sup>La' to ka cha'zchon goljcho yell-lioni, na' to ka cha'zchon yiza'cho. <sup>8</sup>Shi de dii cheej chaocho na' de xalaancho, chiyal' goncho banez. <sup>9</sup>Na' beṅ'ka' cheeni gak beṅ' wni'a, chxopgake' lawi daa nak yeḷ' wzelall' na' lliall'gake' biya dii bi yejni'alallii daa chxinj chlenan legake', na' chtakw chchejan legake' na' chbiayi'lengake'n. <sup>10</sup>Lo yeḷ' wzelall' mecha' chalj chxe biya dii bi yejni'alallii. Baḷ beṅ', yeḷ' wzelall' che'ka', ba bilaagake' lo xnez Chioza' na' ba chile'gakile' zan yeḷ' zi'.

<sup>11</sup>Per li' chono' xshin Chioza', biga gono' ka chon beṅ'ka', san ben daa nak dii licha, ben ka cheeni Chioza', wzoatezi wzoa benlilallee, wdap yeḷ' chaki, gok wal lao yog'lol dii idil̄ illago', na' gok beṅ' gaxjlall'. <sup>12</sup>Btiplaloo na' ben to dii byen gono' daa cheeni Chioza', beena' nonlilaloo. Na' be'l-lall' beni cho' daa nak yeḷ' mban zejli kani. La' ni cheyinnan' gox wṅab Chioza' li' na' bi'o dill' lao beṅ' zan nan nonlilaloo Cristona'. <sup>13</sup>Na' naa, lao Chioza', beena' choe' yeḷ' mban che yog'te dii de yell-lioni, na' lao Jesucristona', beena' be' dill' kon ka nakan lao Poncio Pilátona', chon' byen <sup>14</sup>wzo' dill' dga nia' li', na' seyi cho' chono' wen na' bibi dii mal ta' icheno' axt ni ka yila' Xancho Jesucristona'. <sup>15</sup>La' wllin lla yiyede' ka blia Chioza' bia', Chios, beena' chidol' we'la'ocho, beena' zeelo chṅabia'. Zeelo len' nake' Xan yog'lol beṅ', na' chṅabi'e lao yog'lol beṅ'. <sup>16</sup>Toze' len' biga lliia te che', na' zoe' lo beeni' xen wala' daa kono chzoi wwia. Ni tlish' benech bin' ile'ile'ne' ni bi gak ile'gakile'ne'. Len' chidolee sho'e balaan zejli kani na' biga lliia te yeḷ' wṅabia' che'na'. Kan' nakan.

<sup>17</sup>Beṅ'ka' chle'i yeḷ' wni'ana' yell-lioni, gollgake' bi gaggake' beṅ' cha'sibə, ni bi gongake' lez yeḷ' wni'a che'ka'. La' yeḷ' wni'ana' bi nakan lez. San chiyal' gongake' lez Chios yaa Chios banna'.



Len' chone' zoayaa zoallin yog'lol daa chyallj chchinicho kwenche si'chon banez. **18**Gollgake' gongake' wen, na' koo yichhgake' wzanchgake' dii wenka' chongake', na' segake' wneyi izangakile' we'gake' ben' dii de chegake'. **19**Na' daa gongake' ka', na'chan saki gongake' lez daa zi' za', na' ido'l'gakile' yel' mban daa nak dowalj.

**20**Timoteo, wlooshosh yichjo' dga ba wnia' li'. Bi wzenago' dill'ka' bi yejni'alallii na' bibi zakaan, ni bi wzenago' xtill' ben'ka' chonzə ka nap yel' sin'. **21**Bal ben' ba wyajle'gake' cho'a xtilleeka' na' ba bilaagake' lo xnez Chioza'.

Chioza' gaklenshgue' le' na' gone' ka gak wen chele.